

08 DEC 1997

DEWAN NEGARA BAHAS SOKONGAN TERHADAP KEPIMPINAN MAHATHIR

KUALA LUMPUR, 8 Dis (Bernama) -- Persidangan Dewan Negara hari ini membahaskan usul menyokong kepimpinan Perdana Menteri Datuk Seri Dr Mahathir Mohamad serta merestui sebarang langkah yang dilakukan oleh kerajaan dalam menangani masalah kejatuhan nilai ringgit dan pasaran saham.

Usul itu yang dibentangkan oleh Senator Datuk Abdul Aziz Abdul Rahman juga menyelar sebarang cubaan campur tangan oleh pihak asing dalam urusan pentadbiran negara ini serta perbuatan spekulator kewangan yang menjejaskan ekonomi negara.

Ketika membentangkannya beliau juga menyatakan sokongan terhadap langkah kerajaan untuk tidak mengikut jejak beberapa negara lain yang menerima tawaran bantuan dana oleh Tabung Kewangan Antarabangsa (IMF) bagi memulihkan keadaan ekonomi.

Abdul Aziz juga mengecam perbuatan media asing yang sentiasa berusaha memburuk-burukkan kepimpinan negara ini dengan memutarbelitkan berita secara memberi gambaran negatif terhadap pemimpin Malaysia khususnya Dr Mahathir seperti menyiarkan kembali insiden rusuhan kaum di Malaysia dalam tahun 1969.

Sebanyak lima senator telah membahaskan serta menyokong usul itu.

Mereka ialah Senator Datuk Haji Mohamed Zuki Kamaluddin, Senator Datuk Dr T. Marimuthu, Senator Rosli Mat Hassan, Senator Ding Seling dan Senator Mastika Junaidah Husin.

Dewan bersidang lagi esok. -- BERNAMA

AKT MAI